



OPĆINA STARI GRAD JAVNO POTVRDILA: Istjerujemo novinara jer piše protiv načelnika Hadžibajrića

Na sjednici općinskog vijeća sekretar Alma Destanović je javno, pred vijećnicima, rekla da je razlog zbog kojeg se izbacuje iz poslovnog prostora redakcija portala "Izdvojeno.ba" to što kritički pišu o šefu Hadžibajriću. Tako smo ponovo saznali da se samovoljni načelnik ponaša kao da je iznad zakona, ne libi se da radi što hoće, da mu je dugogodišnja vlast udarila u glavu. Ali neće još dugo, njegove brojne nezakonite radnje dolaze na naplatu

Objavljeno 02. Novembra 2019. 20:00

PRIJETNJA DANA



Na sjednici posljednje općinskog vijeća Stari grad, sekretar općine Alma Destanović (koju je Hadžibajrić mimo procedura zaposlio kad je kao kandidat njegove stranke propala na izborima – **o tome više uskoro**) je javno, bez imalo straha i očito razmišljanja, rekla da je razlog zbog kojeg se izbacuje iz poslovnog prostora redakcija portala "Izdvojeno.ba" to što kritički pišu o načelniku [Ibrahimu Hadžibajriću](#).

Naime, ova sjednica je bila posvećena tematici poslovnih prostora i odluci načelnika Hadžibajrića i njegovih poslušnika iz općine da istjeraju iz poslovnih prostora 20-tak višegodišnjih zakupaca. Među njima se našao i urednik portala "Izdvojeno.ba", koji je u ovom prostoru već 25 godina. Tokom tih četvrt vijeka ovaj savjesni zakupodavac nikad, ali NIKAD nije ostao dužan općini za kiriju, a gradu za režije, redovno svake četiri godine adaptirao je prostor i za to nije ni marke pomoći tražio od općine. Ovo naglašavamo zato što je načelnik Hadžibajrić odabranima isplaćivao općinske naknade za adaptacije prostora. A mnogobrojne ODABRANE dužnike za kiriju nije izbacivao iz prostora, već im je opraštao desetine hiljada maraka neplaćenih kirija. Kada smo tražili, u nekoliko navrata, otkup poslovnog prostora, on nama nije dozvoljavao, a istovremeno je to omogućavao odabranim miljenicima. To što je time radio mimo zakona, nije ga bilo briga. Bahat kakav jeste samo bi odgovarao: Nek me tuže. E pa saznajemo da ga tuže, i to već uveliko. **I o tome uskoro više.**

Ali sve je nekako štimalo, dok se u ovaj prostor nije smjestila redakcija portala. Pored pohvalnih tekstova o radu općine, bilo je i kritičkih osvrtu na neke njegove poteze koji se nisu mogli prešutjeti. To je Hadžibajriću bilo dovoljno da krene u osvetu. Posebno su ga, kako smo saznali iz njegovog okruženja, nervirale kritike na račun stranke koju je osnovao. Jer njegove ambicije su daleko veće od načelnika, on bi da vlada na širem području. Podsjećamo da je Hadžibajrić uoči svakih izbora mijenja stranke i priklanjao se onoj koja mu je omogućavala da ostane na vlasti.

Helem, poduzeo je korake i dao nalog Službi za privredu da se redakcija izbacila na ulicu, a prostor oduzme. Kako naređeno, tako urađeno. To što je cijela ova udružena rabota nezakonita, njih ne zanima. I što će građani zbog ovog biti oštećeni za stotine hiljada KM kada sud presudi, nije ih briga jer ne plaćaju oni svoje propuste iz džepa, već općina iz budžeta, dakle građani. Ali Hadžibajrić je poznat po svom razbacivanju općinskog novca.

Na očite nezakonitosti ovog postupka su upozorili i neki vijećnici, koji ne žele da budu saučesnici i okrivljenici u ovoj otimačini. Upozorili su Hadžibajrićeve poslušne vijećnike da se ovdje svjesno krši zakon, da će uslijediti tužbe koje će općinu zaviti u crno. Ipak, Hadžibajrić ima većinu vijećnika uz sebe (nije se libio i javno reći na jednom od prošlih sastanaka: "Pazite se, svima sam vam valjao") i ne sumnjamo da će on započeto i završiti.

Ali malo su načelnik i ponizni službenici previdjeli neke stvari. Riječ je o ogromnom iznosu novca kojim su oštetili općinu, što će se neminovno utvrditi u tužbi. Kako je riječ o stotinama hiljada KM, ovo se više ne može presuditi samo uvjetnom kaznom. **Za ovo se ide u zatvor**, potvrdile su to i nedavne kazne za postupke nanošenja štete društvenoj imovine zbog nemara i nepoštovanja zakonske procedure (pogledajte proces Skenderija). Kako je ovdje riječ o daleko većem iznosu, ne sumnjamo da će neki od ovih, na čelu sa nalogodavcem, završiti tamo gdje im je mjesto. Odavno. **Jer podsjećamo da je protiv Hadžibajrića do sada podneseno više krivičnih prijava zbog ozbiljnih povreda zakona. Za sada su te prijave stajale u ladicama i gomilale se u tužilaštvu, kažu zato što je pozapošljavao supružnike pojedinih tužilaca. Ali neće moći još dugo jer je sve isplivalo na vidjelo.**

I da, lahko moguće da sud, nakon što dosudi da se oštećeni zakupci obeštete za ove kriminalne radnje općine, naloži da umjesto iz budžeta, štetu namire oni koji su je počinili. A to znači i službenici koji su pristali da budu puki poslušnici. **A kad im onda zbog toga imovine ode na bubanj, a nadamo se da hoće, neće biti načelnika da im pomogne.**